

CHIGITCHAKGRENI NOKMA

ICYLIAN MARAK

TURA BOOK ROOM
TURA, GARO HILLS, MEGHALAYA

4904
Acc. No. 8793
Class No. 4904 Book No. MAF 32
Author Marak Isylian
Title Digitalakgani
Nakong

Borrower's Name Date

DISTRICT LIBRARY
EAST GARO HILLS DISTRICT
WILLIAM NAGAR

Accession No. _____

1. Books may be retained for a period not exceeding *fifteen days* by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it will constitute an injury to a book.
4. *Any such injury to a book is a serious offence; Unless the borrower points out the injury at the time of borrowing the book he shall be required to replace the book or pay its price.*

Help to keep the book fresh and clean

CHIGITCHAKGRENI NOKMA

by
Icylian Marak

**Tura Book Room
Tura, Garo Hills, Meghalaya**

***Published by the Indian Society for Promoting Christian
Knowledge (ISPCK), Post Box 1585, Kashmere Gate,
Delhi-110006 for Tura Book Room, Tura, Garo Hills,
Meghalaya***

8793.
15 4 96
Plus

Copyright © 1984

Nabapress Pvt. Ltd.
66 Grey Street
Calcutta - 700006

**Angni Ma'gipa Sagina,
Jean ia golpoko
knaangna Sikbeachim.**

Uiatsoani

Ia kan'dikgipa golpo sanaba ka'dinge roani, sanaba chanchie niani aro sanaba skidapani ong'naba donga ine anga beberaa.

Ian angni an'tangni gisikoniko segimin golpo ong'a; darangkoba miksonge sea ong'ja. Ia kitapo segiminrang-oni badiaba biaprang ba saniba bimung ba saniba janggi tangani baksa apsan nangrimani dongo-de, 'uan maibakai' ong'gakanisan ong'aigen.

Ia golpo bi'sako seanio anga, Mr. Llewellyn R. Marak aro Mrs. Brucellin G. Momin, iamang jiksesako. uama-ngni dingtang dingtang dakchakanirangko on'anina mitela.

Icyllan Marak

Author

Part I

Na'batmaangni song Chigitchakgreara A'chik songni biap damsao, a'brini a'patal dakao ong'achim. Songni salgrochipak ua jolni chubatgipa a'kimbrirang donga-chim. Salgipengchi onbatgipa a'brirang aro saliramchi chiringni a'kawerangko niwatachim. Wachi somiode chel'achi Songduko rikrak rikrak ching'pile nikatachim. Songade dongansenga, maina balwa balsranga aro chiba a'rak wachi tipjachim.

A'brirango misi sarangde mintokahachim, aro bilsi soke cha'na chu'onggijagiparangba da'ode okumu chaknade nangaengahachim.

Salsao mipring cha'mane, nokgilo dengdale, ma'gipachi janggiltike, "Nokmani a'bachu angaba a'jak re'angnane, ama," Na'bat ma'gipao bi'aha.

"A'ba gamnama, pante am'nama," manenga gnang ma'gipa nokningoni aganataha, "noktongan kam dongja inagita".

"Sal somoiara, bilsira chu'ongaha, pante am'oba mai namgijani," nokkroa wal'ku pongpang pongpang mola ringjoljole pagipa jikgipako kajia am'ataha.

"Im, nang'paan watatode namaia. Re'ang, re'ang,..." demechikna chakani gimin ma'gipa segipako ka'onange namnikbregijasa watataha.

Na'batpade jikgipani namnikgijana an'tangsa ka'dingsike dongaiaha.

Na'bat bik nokchi napbae an'tangni koping tangsim, nokgilo pote dona gitichi, atte aro man'ode am'bol sot-bajolna ine kokchengko ra'e re'angaha. Na'bat baksa ua

songni adita pante me'trarang Nokmani a'bako gamna re'angaha.

Sal jatchinangnango mikgitchak negitchak jamatalo jinma neng' taktokengachim. A'gital pante saksa jamatalo rosoe panteskarangming golpo ka'e ka'dinge nomilrangko kajia ka'e ropaaaha.

Ia pantea songadamo donggipa panterangna bate kraa gitan rongtalbatachim aro agana bewalrangba nambatachim. Uara mande sakchigrike, dal'ang-bolchaang daka-chim. A'chik pante ma'ate be'en ma'kete ja'pate jakpatte dal'dalachim. Knikoba kraa gitan kan'dike roka aro mikkangchipak adita rikkenachim. Ua mandeska baksa meliningna man'gipa golpo ka'o katta man'gipa, tol'e roe ka'dingatna changgipa ong'achim. Songskani mande ong'ani gimin, wanno re'e doe, panteskarangde uko uitokachim. Uamang tol'grike etalgrike rorongachim. Uni songara Chigitachakgreoni kanta gittam ja'achi re'na nangachim.

"Mamasongde bo'na man'ane", pante saksa agital panteko pakkreo doktope aganaha. "Na'songde ui-ku'jaenggen, biade an'ching Nokmani grigipasa. Bimungkode knaenggnok. Ianba Kaling, songde awa nalsaon, Pal'wanggopara. Bisong songode pante roqipade biasanjok."

"Oe, angade gitchajok" ine Kaling ka'dingatna aganaha. Jinma ka'dinggrimaha.

"Bikoara an'ching Nokmaan kangjokkonba," saksa aganaha.

"Aiao, Minjakde chondugaskaenga da'nang," sakgipin aganskaaha.

"Uaba uaba ong'ja, guasutangkon grongkuja," nomilrangchi niate Kaling miksichipataha.

Ia kattarangna Na' batde mikkang gitchakaha; Kaling mikketchichi uko nikengachim. Ua somoionin Na'batde

Kalingko on'timintiba nichakjaha. Uni aganarangna aro gipinrangni bel'belana ka'dingtimana agre ku'saba an'tangde aganjaha. Kalingde Na'batni il'leng siksakako, rama re'ako aro ka'dingako gisep gisep srik srik nie roaha.

Sal ka' sinahao me'trarangde a'ba a'seo am'bol sotrik-aha. Panteskarang baksa Kalingba a'ba ramako songona re'joljole golpororobaengachim.

"Koping tangsim kagipara sawasa?" Kaling sing-aha.

"Mai—ang nogipaanba uara, mosa, ma'deni bi'-sasaba," saksagipa pante aganaha.

"Ba.....mama, uijok. Agandapna nangjajok," sakgipin Kalingko tataha.

"Ong'ja na'a, ong'ja na'a.....uina skesa singengaba, mai ong'pajokna," Kalingde ia kattarangkosan man'-aiaha.

"Oe, chingaba uijok na'a, Da aganbojok," saks tap agandapaha.

"Jajrengnabe mosa, anga ademangnade agane on'-aigen". Indake pante skarangni sitap gitap aganoara Kalingde jrip dongsrangaiaha.

Babils noksamo am'bol ongalako knae Na'batni ma'-gipa pagipa rang'san jrip dakaha.

"Au miksue mi cha'galgalbo," ma'gipa Na'batke aganataha. Pangnade ma.gipara skatang kusitang mi cha'-ako niaia, ua salde maina an'tangko indake agana ine chanchijoljole, chigachi auna basing te'sa ra'jole re'-angaha.

Chiring dilgni dongoba dilsakosan songni manderang ringna aro auna jakkalachim. Ua chigao salode bi'-sarangni chetchat chetchat graparangko, atamehibara me'chikrangni ku'rang aro sal napangabaode me'asa-rangni ku'simita, ka'dinga are jikjakarangko knarongachim.

Dilsagipa chiringde dal'batkaloba chi mesenga, na'tik ang'keba dongja aro rong'terangoba gitchak gitchak dake chirinik ma'bakachim. Ia chiringkoa songo napna skang ga'batna nangachim, aro ia chiringchian ua songko Chigit-chakgre ine mingachim.

Salde napmanahachim. Panterangni aumiksuna re'-baako grongdikna kene Na'bat skelbakel aubroke re'-bapilengachim. Ua ramao pante jinmako jikjakroroe re'-baako grongbebeaha. Ua nichaogija ramako nionari re'-oba ja'gitotmanpilengachim. Kalingba uno dongpaa ine ua uina man'achim. Uamang Na'batna jrip jrip rama wataha, indiba uamangko janggilatsrapgijan saoba gam'e ahamataha. Unsalode maina an'tangko kal'akataha Na'-batde-gisiktango tikkit tikkit chanchiaha.

Ma'a paa sengngang meatam cha'e barandao neng'-taksoengachim. Ma'gipa wa'sco asonge me'rakku bikapo sada dol'e ringengachim. Pagipara morao ja'a ra.dopile asongesa, pakmao dan'dane suk ong'e mola opengachim. Na'bat gansre chinsremane mi cha'na babilisichi napang-aha. Chudapo wa'al so'chimitako spoe ua chakki so'aha. Salgimiko ong'a a'selrang, uamangni ka'dinge agane rogipa kattarang aro Kalingni mikkang bimang pil'taitai uni gisiko nabaengachim. Mepaltangko cha'e nioba ku'sa ku'gnikon okkanikaiaha; achak menggonasa suale on'-ataiaha. Maikaisa okkachangaha, Na'batsa uiacijok.

Nokona gadobaahaon ma'gipa Na'batko barandaona okamataha. Ma'gipa pagipani gisepo sawa mai kattako aganchenggen chanchion man'jaengachim. Maina ding-tangmancha okamenga, Na'batde kenaba kenpilengachim. Da'ode andalaha, noksul songsul adita chel'tangesa nok rike dongani gimin banoba bachibasa wa'alko nikataia-chim. Mande jikjakarangko aro gisep gisep bi'sa grapa-rangkoba knaatkuengachim. Balwa balsrike ka'sinan baksa jong'dol sarao mikoakosa knabataiahachim.

Pagipa katta nachengaha, "Da'sio nang'na skang mangmangsan nang ada ianona re'baaha. Bisongde nang'na Kalingko sing'e nio namgen inenga Nang ma'jong ma'angba namnikaiana."

"Na'ara maiko agangen," ma'gipa sing'skaaha.

Na'bat bamgopari jrip jrip dongaiaha. Dikdiksani gisepon inditan ta'rake koborrangko ra'rurana man'ama, ine ua gisiktango aiao inmanpilengachim.

"Jechakode angasa kratchaaignok," ine Na'bat an tangna chanchiako maibakai gam'e aganatmanaha.

"Sing'e nianade mamung ong'ja, na'asan kratcha'a man'jawa, chingaba kratcha'gen," ine Ma'gipa aganaha.

"Mande sing'ade ramram katta ong'ja, basakoba inteka man'a, basakoba sola-naka man'a, me'chikchinide chakchiknan nangaia. Na'a ku'chakmangmangjokode ong'aignok. Chinga jekoba dakgen," pagipa Na'batko ma'siataha.

"Nang'ni namnikakosa nanga, ja'man ja'wilo nama namja ong'oara chingkosa, Ama apaba sing'drae on'a, ine matnangaigen," ma'gipa aganangkuaha.

Na'bat ma'gipani kattarangko-knatimrikengoba maiko maidake aganchakgen, katta man'jaengachim. Ua gisiktango kusi ong'beengachim, indiba ku'manpiljae gana ku'sreko sakremreme roaha.

Demechik gisiko jajrengenga ine ma'gipa chanchie agandapataha, "Kalingko chinga bi'saonin uia. Ma'gipa baksa gisep gisep mamagipaona, an'chingni Nokmaona re'baronga. Ma'a pamingde chingade namen uigrika. Bia da'o High Schoolo poraipilengjok. Nang'gita Primary jokgijanade mai dakako nangkugen," ma'gipa maneng-angkuaha.

"Na'songsa.....," ma'gipani sairoroangako knana sikjae Na'bat aganchakaha.

"Na'songsa ingipa kattade ong'na man'ja indaka

kamode. Chingko aldu mittanggenchimoba chingade badita sal janggi tangkugen. Pilak duk sukko chaknasi-gipade na'asa. Measa namnika ba namnikja, uade ja'manni katta, na'a chingna bil sikjaode chingaba dakjawa. Da'ororoni chasongde doke-sate, rim'drae-saldræ, kimat-dongatna man'ja. Name chanchie aganbo." Demechikko miktenten nie pagipa ia kattarangko aganaha. Ma'gipa sada sobaktaie, wal'ku dimikpile opaha.

"Indakode sing'e nichimbo.....," bon'kamao Na'bat aganaha.

Ia kattarangkon ma'a paa chu'ongnikaiaha.

Pagipa Na'batko mola so'baate tusichina watataha. Biaptango tuari Ma'batde mikgil sigija, wa'se bibretko niue dongengachim. Da'ode pilakchin jrip jrip ong'bataha. Saksan chanchie kusi ba duk ong'na somoi nambataha. Askirangba teng'ade teng'enga, indiba chel'achi mikka kimani gam'ako knana man'engachim. Matchuri uamangni chiga jakkalgipa chiringjoljol mikororoe cha'amangen-gachim.

Ma'gipa pagipaba ruutgijan tuna kuturiona napang-aha. Uamang an'tangtangni saksu kamkam demechikna mande sing'e on'na dintang dintang ong'bagnirangni gimin chanchisoe, wal tong'sana kingking agangrikaha.

Part II

Salgipino Na'bat ma'gipa be'en an'sengjae tuna nangahani gimin Na'batko a'ba gamna watatjaha. Na'bat pagipade pringwalni jikchol saduchi roaman salchuosa sokbaaha.

"Sagipade namkaljama?" Na'batpa Sing'aha.

"Skokon amjaenga. Nang'ni re'angara mai kobor?" Na'batma aganchakaha.

Na'batpa demechikko nikna sika amchakjae okambing-bangman'aha Na'bat ku'chake re'baoara "Mola so'ban-esa," inata dakaiaha. Na'bat re'angmana-haosa jikgipani sambao asonge sko rim'e niaha.

"Pilakan kusi ong'tokaia, aroba seng'gnangan ma'chi pachi re'na agantokenga. Haida na'a an'sengahaode mik-kang antion re'chimgenkon. Da'al atam somoi tik ka'na agangrikna tom'batokgenna," Na'batpa kusi ong'bee aganaha.

Na'batni mola so'baako grokgrok oproroe tom'bagi-parangna maiko on'sopagen agangrike do'o sa'rongko rasotna tik ka'aha. Na'batpa jikgipana samgiting ra'baako brengna wa'a den'na ong'katangaha. Na'batba merong ale kokcheng singripe do'o sa'rongko rim'e chikkope donaha.

Salpaksa ong'angahaon ma'gipani sko jrimaba komi-angaha. Indake ua demechikni misi ramako asonge do'o riktimsonade man'gen ine Na'batko mi song'na skangan au miksuna, chi ko'na watataha.

Basing te'sa ra'bite jaksamsa ba'ra kancha ra'e Na'bat chigaona re'angengon, tom'bagipa manderangna sachisog-nini gimin chanchiroroangengachim. Ua an'tangde chang-

saba do'o rasote nikkujachim. Ianpakode ma'gipa an. sengjaengani gimin do'oko an'tangan janggi ma'siatna nangguokkon ine jajrengengachim. Indake chanchijoljole re'engon deldikdik chadenge, kinatimaha. Ia somoio sawa me'asa chigao ong'gen chanchie nion Kalingna agre gipinko nikatjaha. Maina pilak me'asarangan indaka somoiode a'baosa ong'kuaigenchim. Katpilna gitik dak-mitingo, kusimitani ku'rang sepangbarikrikenga ine uina man'aha. An'pile re'angako nikode kratchabatani ong'gen ine chanchie, ka'sne ka'sne Na'bat miksongachin remik-kangangaha.

Kalingba salsagipaon songtangchi re'pilna miksonge ba'ra kancha su'dame matchote re'bapilengachim. Uade mamungkoba chanchigija cinemani gitko ku'simitesa re'bapaengachim. Burung dimchang gonggeona sokon Na'batkosa grongdikaha. Bao kusimitkua....ua bakan nama dakaha. Na'bat kratchaa gnang nidoon Kalingba uko niskaengachim. Dikdiksamangmang nitatgrike ka' dingsmitengon uamangni mikronrang gisik ka'tongtangtang ko parakgrikaha.

Salgipino Kaling songtangchi re'angpiljaha. Ua maikoba maikoba pa'sike sal ra'dororoaha. Songo uko pantekarangni kal'aka etalaba batroroaha, maina uko Na'batna sing'e on'na tom'e chanchiako songo-noko jrip donuna man'jahachim. Na'batni ma'drangni Kalingni ma'a paachi sing'na re'angna skang mangmangsa Kaling songtangchi re'angsoaha.

Kalingni ma'a paa Na'batma Na'batpako me'tra pantegrikonin uigrika aro mamung saloba gisik sagrikabagrichim. Uamang ma'drang maharioba mamung kajia ong'ani ba miknenggrikani dongjachim.

Depanteko Na'batna bi'na re'baenga inako knaon Kalingni ma'a paa gisiktangtangode kusi ong'soaha. Detangko indake tom'tomgipa nokdangona watatana agre

uamango kusi ong'batanian dongjawaha gita nikipilaha. Indake Kalingni ma'a paa ba sepangbatgipa ma'drang saksasakgniko okame sriksrik chanchisotokaha. Kalingde ma'a paa baksa nokdang ba'ku rikanirangoni intalan namen agangriksobeaha. Katta mino maiode basakona somoi ra'gen ukomangba chanchigrikaha. Ma'a paade matchote poraiatchengna skaha.

Jensalo Na'batma an'sengaha. uamang nokgimik. ma'de ma'jong dakgiparang aro adita chra gachirang Kalingni ma'apaaona Pal'wanggozona, do'o koksepo chipe, merong ole re'bachimaha. Kalingni ma'gipade Na'batko changsaba nikkujaani gimin sriksrik name niaha aro mikkang bimangde nampabea ine gisiktango namnik-beaha. Uamangni sokbaako knaabaon Kalingni mama-tang saksagipa, apsan songon dongpaenggipa katta knapana re'bapaaha.

Na'batni chra dal'gipa katta nachenge, boning-gipani choli-choldakagijako janape saksamangmang demechikna Kalingko nokkromna watpachina bi'aha, Na'batpaba ja'chap ja'chap demechikko, kamde jaksapja, su'oba min-rakja ine onatbee agandapate, nokni obostaranko aro an'tangni nokko nirokna bil amgijanirangkoba janap-jolaha. Indake aganbewal kattarangko agane uamang ma'drang ge'gni golpo ka'aha Uni gisepon Kalingni mamatangde gisiko suk ong'jae maiba kattao jetojaengachim, maina uade an'tangchisa Kalingko man'angna sikengachim. Uni miksongako chanchichipsoon, uni bel'belbana a'bachengon, Kalingni ma'gipa Na'batna watani kattarangko agangalalataiaha. Indake uamangni mik-songe re'baani chu'sokaha aro mamung gisik. sagrikani grian tom'ani matchotaha.

Kalingde bakbakan poraina re'angpilna nangahani gimin salsagipaon Chigitchakgreona Na'batmangni songona rimangpile sing'aha. Mandeskani agane ka'dinge

roaoni jokna gita aro jikmung demung kajia ong'o jegriktona gita Kalingba ku'chakranaijaha. Sing'na a'bachengon adita neng'nikani aro pa'sikani kattarangko aganchakaha.

Na'batba nogipa nanggipako rimbite babilsio chi ding'atengon Kalingni aganchaka katta mingantikon knarikengachim. Rake jechakengako knaon Na'batde, porairimgipaska me'trarangan baditan namnama don genggen ine chanchiate kratchaan maibasa ong'pilen-gachim

Changsa cha rite on'ani ja'mano chi ding'attaina wa'al so'gattaioa, mikka balsatdape am' bol sosiani gimin wal'kutiptipengachim. Na'bat adita wa'ako so'chapna ra'baaha. Uni wa'a ra'baao wa'ring sogropgiminko nike nogipa ka'dingsmitean,tangchi salrurue ra'aha. Ua uko krusamangni gita pe'tonge chonchongipa kilding gita dakgiparangko ka'sne tariaha. Ua maiko dakna miksong-enga Na'batba uie ka' dingsmite nie dongengachim. Nogipa nanggipa da'o kniding dakgipa wa'a bisringko ge'gni ra'e "Iarangara na'songne," ine Na'batko nie dongchina agano, chankolni a'a bretao ge-gnikon apsan rim' chape mangrake songaha. Ua wa'alko ra'e ku'chot ge'gnikon apsan . so'atahaon ge-gnian apsan apsan kamonangaha. Na'batba gisiko nangen niengachim. Jensalo ua kniding gita dakgipa wa'a bisring tappra pil'aha, ge'gnian dingtang dingtang biapchipaknasa gitchinge ga'akaha. Indake an'tangtangni janggi tang-rimgniko niara ka'dinge rona dakanisan ong'aia ine agansrangnade man'ja aro bang'a salon tik ong'a ine Na' bat uiachim. Kaling aro an'tangko minge so'ahaon tappra bilding dildangsa ga'akahani gimin Na'batde Kalingko uni jora ripeng ong'na ka'dongan grisrangaha.

Da o waltingaha, indiba Kalingde jechak-kuenga aro kattaan on'tisaba nom'jaengachim. Na'batni nogipa

nanggipa sodrokdrok donganan Na'batna ka'sa-chak-pilaha, indake uni gisiko bingbangatna ua songni je pante me'trarang dongachim aro jemangko etale roengachim, pilakkon jora jora minge so'aha. Mitam-rangde wa.a kamangmitingon sakruena gita dakang-pilachim, uarangko nie uamang abisa sakgnian ka'ding-bena skoba gam'atna kene be'en mochipchippile ka'dingbeaha. Songo randi roenggipa budepa baksa Na'batko minge so'ahaoa uamangna wa'a songgipani tappra apsan chape dona gita ga'akaha. Nogipa nanggipade "Bikon ra'srangaibojok" ine sidekdekpile ka'dingbeaha. Na'batde wal'kuako pa'sike mikchi ipake babilsioni ong'katangaha.

Pagipa Na'batni ong'katbaako nikaton mola so'-bachina demechikko aganataha. Kaling atam gimikan on'tisaba Na'batko niatmangkujachim, indiba ianpakode mola so'e ra'baako sriksrik chei'kalaonikon niatna skaha. Wal'kiko spororoe mola so'e ra'bamitingo barandaona gadomitingo Kaling on'tisa niate rang'san mikronko ra'e katpilaha. Na'batni miksrmoni ran'gijagipa mikchi lamp-teng'ana teng'chakaniko nikaton Kaling Chakna man-jaha. Na'batna kratchachaka aro ka'sachakan gape ma'gipa wet pagipa wet sandirokrokaiaha aro gisep gisepde jinmaona maikoba ra'baate Kalingni mikkangona re'baataha. Indimangba ua ka'tong rakgipa gita mesoke, mikgil sa'dikpilahaosa, wal paksa ong pilahaosa katta nom'roroanga dakaha. Indake Na'batni chrarang asong-kapkapcemol'moltaitaie do'o. gisik pilahaosa Kalingko jenten ku'chakatna man'aha. Bia ka'atna sal somoini giminde bilsi bon'ahaosa chanchigen ine tik ka'aha.

Kaling poraina re'angpilahaon gisikan so'so jengjeng ong'aiaha. Ua leka badale lessontangko nirokna a'-bachengon Chigitchakgrekosa nikataiaha. Na'batni mikkang bimangsa lekka jakantion gapaiaha. Joton ka'-beoba uni gisik bingbangaiaha. Gisepo songoni koborko

man'soa, Na'bat an'tangba migital cha'ahaon rongchu su'e merong su'e on'atrongachim. Indake gisik ra'atani kamrangba sokbakamaiachim. Indake ua porikkana poraiaba chinapjae scaba senangjaha.

Bilsa bon'o Kalingni re'bapilako ma'a paa 'kusi ong'-bee nichaksoengachim. Beanbebe salsao atamchibara ba'ra boe Kaling noktangona re'bapilaha. Ma' gipa noksamoniko pringo rite cha'na ta'bolchu bilengachim. Pagipara sambijak brengna wa'sing sinengachim. Niksoarin ma' gipa gitchiko dongale ta'bolchu bipango rim'chale chadenge detangko nisoaha. Mikkang simdik ku'simtektek dakanan, jedakeba porikka namjakon ine chanchichipaha. Indake ua porikkako sing'na sikoba janapjoljaha, "Mai bajini gariosa re'bajok" inesa ma'gipa sing'aha.

Jikgipani sing'ako knae Kalingni pagipapa nichaoe depanteko nikoa mamungkoba chanchigijasa, "Porikkade mai rokom" ine sing'ataha.

Kaling adita jrip dongchengesa ka'sinbee, "Namja" ine aganataha.

Pagipa rang'san nichaotaie depanteko miktenten nitate "Bilsisa gitchiade gitchigramaijok, koros bon'gramaijok," ine gam'e manengataha.

Ma'gipa ta'bolchu bilgiminrangko kolamengachim.

"Da'o nang'na agane mai lap ong'kugen. Gipinrangde mande tik ka'e doneba poraitokainga, pass ka'tokainga. Chigitchakgrechin na'ade re'angaibojok, buchuma budepakon alduaibojok," ma'gipa tap satkapa gita inatskaaha.

Da'nang, Kalingde ma'ani paani ka'sariri rimchaksoako man'rongpagipara, da'alo watgalata gita saisoora, mikchi jingjang jingjang dake nokgilchini do'gachol gita nigame dongaiaha. Ma'a paa da'o uko ka'onange simsakbrejaenga gita nikaha aro uamangna ua dukko ra'baaha ine Kaling da'o ma'siaha. Indiba iana ua sakon dos galgnok, sani a'sel ua chu'sokjaha, uko namatpilna saoba maikoba dakna

man'genma ? Ua nokgilchi do'gacholo songdate chanchie dongaha.

Na'batni chrarange Kalingni re'bapilakosa senge dongtokaingjokchim. Uamangba Kalingni porikka senanggiako knaahaoba, poraikuchina aganani pal, uko rimbae sal somoikosa tik ka'aha. Somoiko seng'gnang ra'e, pilakan melitokahaon dingtang dingtang kamrangna chabildangtokaha.

Kaling aro Na'batko bia ka'atna tik ka'gimin sal sokahaon Kalingba ma'a paa aro bakdrang baksa Chigit-chakgreona re'baaha. Na'batni noksul songsul aro chane bane rogiparang merong mechu olbae, wak matchu on'e dakchakgrimaha. Indake pilakan kusi ong'e cha'e ringe kamko matchotataha.

Salsagipao Kalingni ma'gipa depantena ku'patie, mikchi ipake songtangchi re'chakataha. Kalingni ba'ra kancharangko bobagipa, gritangrangna Na'bat ma'gipa nokoni do'bisa manggniko koksepo chipe on'ataha. U-maangni janggilate re'angpilako, Kaling mikchi jingjang jingjang nirikaha.

Part III

Pal'wanggoponi Kaling Na'batko donge Chigitchakgreo saksa gachi ong'paaha. Ua songko nokko dilgiparangoni mongsongbatgipa saksa ong'achim. Janggi tangpana uamangba a'ba o'e cha'paachim indiba Kalingde, Schoolo poraimitingo salak-wachi chakrongpajae a'bao chakchike kam ka'na man'pajachim. Bang'a somoion ua songjinmachi ong'one rorirangmung melie badingrongachim. Indaken Banggal-rori ku'sikkoba raprapaiachim.

Na'batna mande rime on'ani rutkojaon, sin'karini somoio salgittamna joljol mikka wabeaha. Na'batpade da.nang ka'sina man'e ka'tong saaha aro samggitting bolgiting am'e on'oba jaksrapjae siaha.

Songko dilgipa saksa ine Kalingko songni manderang mande ra'achim. Budeparang bilisini kri aganna changgiparang ong'oba chanchina changaniode Kalingan bataiachim. Songni Nokmana agre una gadang batgipa dongja gita ong'pilachim. Kam dakarango, a'sel ong'arango mande ra'na kragipa biaposa chokki mora sale on'rongachim. Gro man'ao, mela saldongao Kalingkon manderang sandirongachim.

Chigitchakgreni manderanga bang'batan bimungtangko mangmangba sena changjachim. Uni gimin basakoba chiti ba songna maiba lekka sokbaode Kalingchisa ra'angtokaiachim. Uamangni Nokmaba poraina ma'sijae bang'a somoion Kalingoniko dakchakaniko am'rongachim.

A'gital manderang re'baode ua kusi ong'en soka chakachim. Songre songgabate uni noko nappakgiparang darangba cha'gija ringgijade re'angrongjachim. Bilsi soke

cha'aniko chimongna man'pagijagiparangba uamangosa su'nap song'napé janggi tangpaachim. Jakseramani bidingode uko matnangnan man'jawachim. Noksul songsul ra'chak srooba gro rikrongja, kusitang ra'bapile on'akosa ra'soaiachim. Ia a'selrangni gimin bang'a manderangan uko namnika aro uni obosta namani giminba uko mande ra'ani gitaba "Nokma" inesa okamrongachim.

Bilsisa ong'haoa Kaling aro Na'batna walsao demechik saksa atchiaha. An'tangni song Pal'wanggoponi buchumako, Na'batko sanna Kaling rimeataha. Uamangni song jolode ia buchuma gita jaksapgipa kamal darangba dongjaachim. Uni bimungchin an'tangni skanggipa demechikko Wanme minggen ine Kaling aganahaon buchuma namen rasong man'beaha. Wagam go'oktoke wajaringrarako nikoba ua kusi ong'bee ka'dingsimsimaiha.

Demikkang nikahaon Na'bat aro Kalingni nokdang dintang kusi ong'ani gadangona sokaha. Ambigipa bilsire'angani kri su'na song'na bilakjaoba bi'sa niriktimpaaha. Jikgipani morao asonge bi'sana sok kanako niengon Kaling gisiktango rasong man'beachim. Kalingba Kamtangoni nokona re'baode degipako ba'jojoe songgimik roamdilachim. Skanggipa bi'sa ong'ani gimin uni dal'roroanina pagipa namen gisik on.a je, Wanme basako ka'dingchenga, wagam naa, asongna raka aro indaka salrangko gisik ra'kame dongachim. Wanme bilsisa ong'ahaon pagipa uni atchiani salo alaha aro ua sok watahaon chu'onga gita dut ringna man'na gita matchu mangsako breaha.

Uni iachi uachi songjinmarango re'jojoe badingmitingo noko, mongsongbate a'bao kam ka'na mande dongjachim. Uni gimin ua songtang Pal'wanggoponiko, bilsio tangka ritchagnina rakkaha. Uni kamara a'bani pilak dakna nanggnirang, gisepo am'bol sotani aro matchuna jeng den'ani ong'achim. Ia panteni bimungara Mingsan ong'achim;

changrobrejaoba bitong dal'a aro an'gitchakachim.

Na'batni madrang nanggipa ma'gri bi'sa saksakoba uamang alduaha. Ia bi'sara Wanme ambigipani rimbachengmitingode ako pari dakana kni kochironge rokani gimin kodarongrong dakachim. Uni gimin Kaling uko Koka-rong ine okamrongachim. Indakesa uko gipinrangba Koka-rong ba Koka ine kan'dike mingaha. Ia bi'sara maiba a'selni gimin atchiaonin nachil knajae kusik man'jaha, indiba ku'sik mojimako nikode ua manderangni aganako ma'siachim. Maiba gam'beanirangkode ua knaa gita mesokachim. Ua an'tangde mikjip jakjip dake chinchisa gipinrang baksa agangrikachim. Koka bi'sani kride kam gong'bea aro chonchoma nokni kamrangko dakchakpaachim. Noko kam dongjode uaba a'bachu re'paachim.

Wanme bilsu gnimang ong'ahaon pagipa nokkap dongansengao, songmako niwate nok gital rikana. Sa'ra atilakoba chirongbit dakpile bakaha aro sara gimik wilwile te'brong te'gatchu ge'aha.

Noko nangbatgipa, mongsoggipa kamrangko mat-chotahaode Kaling badingna ong'onangrongachim. Indake ua basakoba jasa, basakoba jagni dake noko dongjachim, indiba jensalo nokona re'baa, nokni manderanga saktike maikobade ra'barongachim.

Je mandekon niksenga, uni nama ba namgijako mandeska nikninga aro mitamrangde mikbue uni gualaniko am'rikkita. Indake Chigitchakgre jolni manderangba bang'batan Kalingko mitela aro mande ra'a indiba saksasagnide uni nokdang dakana, cha'a ringana mikron sa'dikachim.

Kalingba an'tangni kri gaora de'aniba dongachim. Jikgipakoba an'tangna dingtangmancha simsakakosa nagnikachim. Indaken basakobade ua jiktangko man'dikatbeachim. Ua noko dongode mande roa chotchangjani

gimin cha dake mi song'e on'nan amchakpiljae Na'batde ka'o nangpilachim.

Jikgipa ka'onangenga ine uioba Kalingde ritchenge ra'aiachim. Jikgipa skia man'pajani gimin uianiba komia aro chanchisokja ine Kaling uiachim aro pangnan jiktagni ka'onange aganbingbangarangko kema ka'achim. Ua an'tangan nokni skotong ong'e nokdangko tom'tomaniara an'tangni jakon ong'a ine ma'sia aro chanchie kattarangko agane jikgipani gisikko ka'sinatrongachim.

Part IV

Bilei jatchimango me'rakku te'e chakario, salsao sal engangpile ding'engachim. Chigitchakgreni songsul Dolbarini Notjeng anti cha'e bitchi ringbae an'tangni matchu gario re'bapilengachim. Ua sorok bidilmaoni Dolbariona re'ekgipaona sokahaon songmaona doangenggipa truck ge'sa dondikaha. Maina gariara dondika, sawa gadoanggen ba ong'ongen uina ske Notjeng nipilataha.

Gari mikkangoni Kalingsa jolonga borong botong kea gnang jakoba jaksamsao jola ge'sa ra'bite ong'onaha. Kalingni ganding chinding aro okko skang wate re'ako niksoon Notjengni gisiko mikbuan gapaha. Maina uaba Kaling baksa apsan chasongni me'apa ong'achim. Rasong grianio ba an'tangni cholidigianio uade cha'atok ringatok dake janggi tangpagipasa ong'achim. Kangalanan ba'ahaode bachi mandapkugen ine ua gisiktango chanchie an'tangko ka'dimeataha.

Kaling an'tangni bosturangko ra'bite ja'achi songtangchina re'bae Notjengni matchu gariko srpnasiengachim. An'tangni gisiko miknenganiko janggilchi done Notjeng ka'dingsmite Kalingko an'tangni matchu gario gadoe re'atna miksongaha, maina Kalingni song Chigitchakgreonade Dolbarioniba chel'en ja'achi re'kuna nangachim.

"Bachinisa Nokmade da'alde", matchu gariko dondikate Notjeng sing'ataha.

"Anti cha'jolesa re'baenga. Wenade bang'a". Kaling aganchake gario gadoaha. Ua ki'sangchi asonge cigarette pongni saloke Notjengna pongsa on'aha.

"Angade indakgipakode cholija", ine agane Notjeng jechakaha aro an'tangni ra'bitgipa biriko chola jeponiko bikote Kalingni dislai natao an'pile so'bakaha. Da'o Kaling an'tangde so'bakmane kuchilo gildede ma'baka gita cigarettoko chikkapengachim. Notjengde iako nikoa babu dal'giparangko ja'rika ine chanchie pil'e mikbuani gisikan nabataiaha. Kalingni gaorako on'tisa ra'ona man'ode chu'ongnikbegenchim ine ua gisiktango chanchiaha.

"Songo nokona nabagijan na'ade ruutahakonde", Notjeng sing'aha.

"Bilsisa pura ong'aha Nokode maian ong'tokenggnok", Kaling chanchie aganaha.

"Im, songni nokni obostakode na'ade knakujawa. Ang noko neng'takbo, anga tale agangen," ine Notjeng, aganskaaha. Ua bitchi ringe mikmakemung bingbang aganataha. Pil'sa gitara, ian Kalingko gisik ding'atna chol ineba ua chanchiengachim.

Notjengara maiko ma'sibregija aganaha, Kalingde uina sikbeaha. Ua bakbakan knana sike sing'aha.

"Knaoba nama, knajaoba nama," ine Notjeng aganchipila dakaijok. Katta namgija ong'nan nanggen ine Kaling chanchichipna man'aha. Ua suk ong'gija matchu garioni niwatroangaha. Sorokara matchu garinasan cho'aiani gimin apchona, banoba rong'brakrara banobara mikka waani chi man'ruronge katenba rama namjae matchu garian chongreng chongpeng dakpilengachim. A'bri joljol Dolbariona dakgipa ramako uamang re'angaha. Gisepo me'gong gongdapa aro angkil cheksirangara banobade nangrapna gitik dakengachim. Samsachi mi asu a'pal gimikan tangsekgilgil bite dakbaengahachim, samgipinchi a'briko a'ba o'e cha'giparangode misi minakon a'ba a'serango rimate nikatpilengachim. Songtangni mande-rango saa siarangko golpo ka'roroe uamang aditani ja-

mano uamang Dolbariona sokbaaha.

Notjeng Kalingko noktangona rimange, minil bitchi bi'ambae on'aha.

"Ramao nang'ni janapgipara maiachim. Da'ode aganbojok," Kaling uina sikbee janapaha.

Notjeng morao asonge, sko rim'e chanchijoljole," "Maidake nang'nara agangnok da'oara," ine gisiko suk ong'breja gita aganaha.

Kaling uni jaja jiji dakako nike maiba ning'tua donuani katta ong'akon ine chanchiaha. Haida dedrang maiba a'selo ga'akahama, ba nokoni saoba sanang ding'nangjae siahama ine uni gisiko chanchiani nabaaha.

Sakgnian a'palchi niate, saksa sakgipinni aganchengana nina nichakengachim.

"Je a'selkoba agansrangaibojok," bon'kamao Kaling mol'molsrangaha.

"Kattade namade ong'ja," Notjeng a'bachengaha. "Mandeskaanasa da'oba aganaingjok, ching jolode nang mandekode mejaonin maiba inesa jing'jangengjok."

"Maisa ong'a ?" Sengnapjae Kaling mikron dal'atpile nitate sing'aha.

"Ong'ja na'a, Wanmemakode na'song pante rakkigipamung habijabi knaenga nesa."

"Mingsan !" Kaling jagokmanpilaha.

"Da'o debraonigipakoba binisa intokenga, Nokmade jadade gam chimonge jamangengjok, inesa mandeskade ka'dingtokengjok," Notjeng agandapaha.

Kaling da'o tongtong chanchina man'jaengachim, maina chanchisogija somoio tu'begipa a'kuango ga'akonangenga gita, ga'chaknan mamungan dongja gita, ua jadip changpilaha. Ua an'tangni re'bagimin ramachiko niwate dongchaaha, maina indakgipa koborko knanade uni gisikko tarisojachim. Indake ua cigarette ponggittam-

kode, pongsani ja'mano pongsa ringe dikdiksanon bon'ataha.

Da'o saljatchimang ong'ahachim; joljol noktangona re'angode ua sal gnangan sokegenchim, indiba ua seng'gnang sokna sikjaha. Ua an'tangni uigiminrangko grongnan pa'jawa ine chanchiaha. Indake Kaling Notjengni chubitchi ra'bataie on'ako ringe adita salniataha.

Sal on'tisa salniangahaon Notjengni mande misi ake sokbapilaha. Ua saratango Kalingni ku'sik miksik ok'sogija sodrokdrok asongako nike, ong'ronggija a'sel ong'agita nikpilaha, maina uaba Kilingko bel'belna man'gipa ine uiachim.

"Songchi doengama, Nokma," Notjeng jikgipa Kalingko sing'aha.

"Oechim, de, dongchimbojok angaba re'skagnok," ine Kaling re'na chakataha.

Notjeng jikgipa Kalingko cha ringangchina mol'mol-ahaoba chana batgipakon ringjok, ine jechakaiaha. Indake uni re'chakatahaon Notjengba chakatpac, "Manderangni kattasa, na'a an'tang mikrontangchi nikosa bebe ra'aibo," ine ku'patiataha.

Kaling adita chel'angahaon, jikgipa Notjengko nigit-oe, maiba a'sel ong'ama, maina indakgipa kattarangko ua Kalingna aganna nangaha, ku'tipgija sing'betbete dongaha.

Notjeng moratango asongpilaha aro songbat bichitko chite sada dol'joljole, ka'dingsike indakesan' aganchakaiaha, "Kalingni obosta da'ode maian ong'gen aisoaibojok."

Part V

Salaramchi mikkange Kaling jikdeni songona ka'sinsin doangaha. A'bri a'ding dona nanggipa mande ramasan ong'ani gimin pilakchin burung diktipachim. Dimbil a'dingko doangreroon, gisep gisep pang' sangaona sokode iachi uachi niwatrooangaha. A'pal jolo chibimani jokako aro mi namako tangsekgil dake nikwatatachim. Ia nika-nirangko janggilarion uni gisik jime chanchianian nabapilaiaha. Notjengni katta baditana kingking tik ong'-enggenchim, uko maikai sandigen aro songtangni manderangko maikai mikkang pa'gen, iarangni gimin chanchiroroe re'engon uni ja'ku tang'jaengachim. Gisep gisep do'kruni aro gisepo nonoini mikoako knana:man'engachim. Aram gri sal nambea aro basakoba balwa ka'sinjrjmrim balbae Kalingko dongtoatachim. Noktanganon jol jol re'genma ba chatchi mahari nangao napeaigenma, bikpil pangpil uni gisiko chanchiani ong'engachim.

Sal napna sepangbaengaha Kalingba Chigitchakgreona sepangbaengahachim. Anti cha'e re'bapilgipa mande sakgni uko srapeaha

"Ah, Nokmaba re'bapaenga, bilsu gimik nikso-jaanan katchipjokkon inesa angade," skang re'gipa budepa kal-akjoljolangachim.

"Namoba.....namjaoba.....noktang.... Kaling nipilgija aganchakaha.

"Misi cha'na gisik ra'e re'bapaengen da'nang," ja'man re'gipa aganskaha.

Ia manderang baksa re'ode mamungkoba chanchina man'jawa ine Kaling gisiktango chanchiaha. "Na'song

re'-sochimaibo angade ka' sinsinsa re' aigen," ine agane ua uamangna rama wataha.

"Ra indakode, ka'sinsin re'babo' na' ara baju dongesa indinenga uara," indine agane skang re'gipa budepa Kalingko re'sretaha.

Saksan ong'osa, jekoba ka'sne ning'tue chan-china man'aha, maina Kalingni gisika, badita songona sepang-roroa inditan ding'engachim. Sal napangeng-mitingo ua bon'kamgipa a'chikko doengahachim. A' kimbriona soke ua songko nigamaha, aro an'tangni re' bagiminchiko nipilataha. A' bri mitinrango jagringrang andalsiksik dakbaengahachim. Sal napangani rongrangko dikdiksana nie roaha; ia somoiode uarangba Kalingni ka'tongko ka'-sroatna man'jaha.

Chigitchak chiringko ga'bate ua songona sokaha. Mande jikjakarangko knana a'bachengaha. Pangnade ua me'apaskarangko nikon chadengdike golpo ka'e agangrikachim, indiba da'anpakde an'tangni re'baako uiatna sikjae bamchikchikari, jripjrip ramadingding re'angaha.

Nokningo wa'al jretjret ching'arangko nokantion nikatengachim. Saoba saobarang ding'ana sarao komilong balwa chake rotokengachim. Noktangona dogatahaode sim-simangengjokchim. Uni gisiko da'o bikit bikit dong-tojabaengachim; uara mandeskana kratchaama, jikgipako ka'o nangaanma ba ka'pakasama ba gimikan brinama, aganan man'piljawachim.

Ua saraona sokahaon, Wanmeni babilsioni mi cha'e ong'katako nikdikeaha. Wanme rang'san, "Baba, baba," ine chrikwate chabaaha. Ma'gipa babilsu do'gacholo nauatahaon segipako nokona gadoangako janggilkosa nikrikaiaha. Pangnade segipara sara ga'taparion demechikko okame-jolrongachim, da'anpakde sae ding'esa re'baama, jajrenga gnang Wanmeni cha'chak ringchakanrangko babilsu noksamo su'galaha.

Kaling kuturio jolarangko done, chokkio asonge, wa'ako gijip watako kolame jippongpongengachim. Ua je biapo asonga, unoni a'palchiko do'gachol gita nikatachim. Ua neng'taksrapkujaon jikgipa babilsu noksamo sanaba maikoba aganako nikataha. Andalangahani gimin mik-kangko rongtal jahaoba, jena aganengachim uara Ming-san ong'chongmota ine Kaling be'en bimangko nikaton ma'siaha. Ka'sne aganani gimin Kaling namungkoba knana man'jaha, indiba ua gijip jipako dondike nie dong-chaaha. Wanme pagipani sambao donge bi'sani sing'anirangko sing'engachim. Kaling demechikni sing'anirangko knachaknan man'jaenzachim, ua saksan dongna sike, an'tangni bostu ra'bagiparagonik bikote basee Wanmena on'ataha. Kokakoba jakjipate una chola ba'rara'baako gane nichina aganataha. Jikgipa babileio maikoba dakchaenga, uni re'baana kusi ong'e mesoksoja aro uija dake dongenga, iaranga maini a'sel ong'na nanga, haida Notjengni aganatgipaane bebe ong'akon ine Kaling gisiktango ehanchie dongengachim.

Ia apsan somoion segipani ku'rangko knajani gimin Na'batni gisiko kenchakani ong'kataha. Ua saobading'oba indake jipjrip donggipa mandean ong'jachim. Jedakeba ua sakoba ka'o nangenga ine Na'batde kenchakengachim. Ka'o nangronggi jagipa mandede ka'o nangna changja ine mandeskarangni aganako gisik ra'e segipa ia somoio mai ong'gen ehanchiroroe, segipa sokbaode chini-cha ra'barongani giming, cha dakna chi ding'atengachim. Segipani gisik ka'sinkujana kingking uko golmal ka'jana na'bat miksongaha. Jensalo Kaling ka'o nanga namaha, unode an'tangni ku'sik on'bagen inesa ua nisengengachim.

Kaling mamitangnipani kuturitango bi'sa mumuengako knaengachim. Ua jiktangko nokona gadobaako nichakoba niksojac, maidakemancha ruutenga, do'gao rim'pakkrange niataha. Chu'dapo wa'al ching'engani gimin jikgipani

an'tangchi janggilate chankolchi mikkange asonge dongako nikataha. Rang'sanan uni wagam chikspitaha, maina ua da'o an'tangko mangsongchongmoten gelenga ine jikgipako rim'na man'aha.

"Mai dakchaenga uchiara," Kaling jikgipako rang-rangataha. Wanmede Kokana an'tangni bosturangko mesoke, ba'rarangko nesusae sambao jikjakbeengachim. Pagipani rang'datana jagoke ua rang'san jrip dongaha aro uamang kene ambitangni kuturichi sriksrik re'angaha. Ambitangba chawarini rake aganako pangnaba knakujani gimin jajrengna a'bachengaha. Uaba hi'sa mumugija jrip donge, mai ong'angkugen nisengaha.

Na'bat segipani saiatako knaon, an'tangko ka'o nangani a'selkon uijaengachim, indiba jeba ong'bo ine ua segipana bamaniko mesoke, babilsini do'gako salpenge nokona re'baaha. Segipa miktenten nitatsoengachim. Indakgipa mikkangko aro wal'chana gitik dakpilgipa mikronrangko Na'bat mamung saloba, darangoba nikku-jachim.

"Manderangni ku'sikan kakket ong'bebea, angni kosako maikai indake dakna ka' donga," ine Kaling rake rake sing'aha.

"Maiko indake aganenga, angade uija," Na'bat ka'sne aganchak'aha.

Ku-tipkujaon Kaling jikgipako knitomko rim'kete nokningchina salruruangaha. "Maina jeenga, anga mikrontangchi nikaha, na'a da'sio babils noksamo Mingsan baksa maiko agangrika?" Kaling jikgipako kil'oko sikdekdeke sing'aha.

"Matchu kanasa—do'nol chipnasa agana," ine Na'bat aganna a'bachengaha.

"Ukon indita ruute aganna nangama? Na'a tol'na a'bachengaha. Nangni gisiko mai donga kamchin mesok-jok," ine jaktome janggilo gip gip dokna a'bachengaha.

Wanmeni ambitang demechik-chawarini kajiako mai-kai bingbangatgen cholko am'aha. Depanteni mikkangko nikode ma'gipana ka'sachaknaba donga ingipa chanchi-ania Wanmeni ja'sin da'o rama re'dekdalenggipako jikse kajia ong'enggipa kuturiona watataha. Bi'sako nikarion Kaling Uni kniko' an'tangni kni rikkenako doneba Mingsanni kni gitasa srakmrak nikaiaha. Ua bi'sa ma'gipaona dekdak dekdak re'ange sakgnini gisepo mandik man'si dakateaha. Ma'gipa bi'sako de'tomna dakengachim. Kaling jiktangko bi'sa rimahaode doktojava ine bi'sani jakko jaksamsa rim'dengdenge bagita re'baa ugitan goat-pilaha. Bi'sa krongo nangtinge ga'akeaha aro changsamangmang bil gimikchi chrike sibokaha. Ambitang chawatange bi'sako kolame mai ong'a, bano mata nina de'tomon ja'a samsa' ja'pingoni ringre ringre dakakosa nikaiaha.

Dikdiksani ja'mano bi'sa miksele simang tangmang graptaiaha.

"Mai dakpilgipa mandesa.....bi'saoara mai dos donga.....mai dakpilgipa mandesa....." bi'sako malmokroroe,-de'jengjenge, chawariko ka'o nanga amchakjae, saina kattakon man'piljae, manitangde indakesan inna man'aiaha. Sitengtoe grapenggipa bi'sako malmokoba ua jripatnan man'jaha. Be'gimin ja'ako jaksamsa rim'kape, ja'pingo r!me an'tangan mikchi ipak-pilengachim. Wanme aro Koka mamungkoba dakna uigija nikuke dongtokaiaha. Mingsande nokpantechi tuna re'angman.ahachim.

An'tangni saknaan baksa mamungkoba uikugijagipa bi'sako inditan ka'saninggija dakako nikoara Na'batde ka'tong bretna gitik dakpile segipako ka'onangaha. Indake ua setangna kenoba, ka'onangan ka'chi segipako inchakna ka'dongaha.

"Nang'gita dakgipa me'asakode chasongnaba nikuja, na'a noko dongode indaken so'sojengjeng ong'aigen."

Na'bat segipako ku'sik raka rakjachi krengaha.

"Angni noko dongako nangjakonba," ine krengdopilana ka'onangbatroroe, Kaling jiktangko engrimole dokjolataha.

Indimangba Na bat jrip dongnan sikchongmotjae, "Ango mai dosko nika, bi'sako maina saknaatna nanga". rakbatroroe chrikaha.

"Angko krengdopilengama, na'asa angko ame donna am'engama," knie rim'e Kaling salwingwingaha.

Na'bat palango rim'skape chakaha, aro an'tangni bil gimikchi chrikataha, "Maina inditan seng'a'daka. Nang'ni alduako cha'esa

Katta matchote aganna man'jaha Kaling rang'sanan jikgipani ku'sikko bilsue su'ataha.

Na'bat ku'siktangko rim'kopkope grapengon, jaksi bibretrang gita an'chi jo'olbaengachim. Kaling uarangko mamungba minggija an tangni jolongga sitee donako ra'one, uni bostu ra bagiparangko otrurue, kingsa kinggni ba'arangko sikhepchepe, kuturioni ong'kataha.

"Mamungba dongjaode mandeskaba banaichrakede aganjawa," ia kattarangko Kaling nokningchi nipilmanggija gam'e agane sarako re'angaha. Ua sara rikamo bera kagipaoniko ritchok su'ako monggot dakna saloke, noktangoni ong'onbaaha. Koka aro Wanme do'gacholo nirikoba chu'ongnikjae saraonaba ong'katsrange Kalingni bimang andalmitmatao gimakujana kingking nirikaha.

Aram dongjani gimin walahaoba rama ja'kolde nikaichim. Songni manderang pilakande tusitokujachim. Badiaba nokrangode misi ba ini su'engachim. Ia somoio gipin bi'sarangde srikritik tutokengachim, indiba uni nokonide bi'sa grapa adita chel'aonan janguengachim.

Songko badeahaon Kaling ramasamo wa'a bichong donggipaoni wa'a gisirangko chimonge, pe'chame, bilcham tariaha. Walni somoio burungrarako saksan. re'na

kenani ong'genchimoba ua da'o kena-sin'a ingipako rek-tek gisik ra'srangjaha. Jiktangan jegalahaode maikai nok-tang inkugen ine ua namen gisik sabeaha. Pil'sa gitara, niam gita mela saldonge gro jenama—katta talnama ineba chanchiaha. Indimangba ua jiktanko dos donge nik-chongmote, an'tangde me'apaskarangko mai mikgilo grongkugen ine gisiktango jerara'e nioba katsrangon nam-bate nikaha. Jakasichi bil'cham nate jakrachi monggot ra'e ua ramako ong'onbaaha. Jensalo ua a'palko nikwat-aha, bano walko seng'atgen chanchiaha. Dolbariona ong'on-srange Notjengni noko waltunaba, an'tangni katbaako uiatna sikjaengachim.

Ramao chadengdike Kaling iachi uachi niwilwalon, on'tisa a'dingo rangre bolmako nikaha. Pekkam namaona gadoe ua unon walko re'atna asongaha. Walo roamgipa matburungrangni burung jile re'angako basakobade kna-rikna man'achim. A'skochi matcha elbikako knaoba ua da'o jajrengman'gija an'tangna ong'a obostarangkosa chanchina a'bachengaha.

Na'bat gita jebasi bel'belgijagipa me'chikko jik man'na Kaling an'tangko rasong gnangnikbeachim; uamang namnikgrikmanchaen kimaba kimahachim. Bilsa bonga ong'srapgijan uamangni janggi tangrimanio indakgipa kajia-golmal ong'na nangaha. Ian uamangko chasongna ekgrikatgnokma ba seng'ahao dopile jikgipako kema ka'e namgrike donggnokma; iarangan una chanchibeani ong'aha. Ua an'tangni demechik Wanmena ka'pakbeoba, chongipa me'a bi'sako gisik ra'aton bi'satang ong'jabe-bekon ine jikgipakosa bika bikilpile ka'onangbaskaiaha. Rikkirikkot agane mandeskade ka'dingstekaigrok ine kratchanike ua an'tangni uigiminrangko gelsrangna mik-songsrangaha.

Indake Kaling seng'jrangjrang dakengpition boloni ong'one, darangba nikrikjana gita skel-bakkel Dolbariko

re'pakangaha. Matchu gari ramako re'mitingo ua hal wena re'bagiparangko grongnaba donga ine kenengachim, indiba rasong gnangbee uni ska gitan ong'aiaha. Seng-brakahaon ua sorok bidilmako re engahachim. Da'o ua okkriako aro neng'ako uibaaha indiba ua iarangko ming-gija ama dipet gong'rake re'angaha.

Adita salchukalahaon uni ki'sangchipak bus ge'sa re-baengachim. Banonan re'gen miksonga gri ua jak songsoe gariko dondikate, ua garion gadoe bachinaba re'mik-brangangaha.

Part VI

Ruutbea bilsini ja'mano ding'karini salsao salniangachi-
bara gitchambegipa jolonggako kee, monggot kottine
Kaling Dolbariona dakbagipa matchu gari ramako re'-
baengachim. Uni kni bokbeaha aro be'en bimang nidik
nisi dakpile ram'ahachim. Namen bilgri ong'ahani gimin
ua ka'sinbeesa re'engachim aro gisep gisep bol salakimo
chadengdike neng'takengachim. Ua apsan ramako
sakgipin manderangba adita bang'en re'ruraengachim.
Ia budepara sawa, uamang re'sretmitingo, ba uni neng'
takengako nikangoba darangba gisik on 'jaha, maina
uamangoni darangaba uko changsaba nikkujachim aro
uikujachim. An' tangni re' ronggimal ramaan ong'oba
da'o ua re'gija dogija ruutbeahani gimin Kaling ia ramako
dingtangbeesa nikaha. Sorok apalbataha aro pang'-
sangbatahachim. Dal'dalgipa truck garirangmangba Dol-
barionan sokpile re'na man'gnokchim.

Atam salniangahaosa Kaling Dolbari songsamona
sokaha. Ua songon saniba noko waltuna nanggen ine
manderangko gisiko chanchiate nioba, inditabilsa ruutani
ja'manode manderangan bachin ong',enggnok, unaba
jajrengman'engachim.

Songona napsrangahaon Kaling biaprangko, nok-
rangko bang'bate aro dingtangbee nikaha. Ua niroroe
re'engon darangan uko agital mande ine ma'sina man-
achim. Adita manderang ramasamo donggipa nokni
sarao tom'dakengachim. Uamang uko gisik nangen
nirikaha, indiba darangba uiani chinko mesokjaha.
Kalingni re'mikkanga ramao adita bi'sarang kal'griksoen-

gachim; uamangba pringprang kattokaha. An'tangni mik kang bimang inditan nidik nisi ba kenbegni ong'ahama ine Kaling kratcha-pilengachim.

An'tangni uigimin nokdangrang aro me'apa-skarangko chanchiatpile nion, Notjengkode nikna ka'donge, uchin mikgil napaig nok ine Kaling uamangni nokchina dakgipa ramako re'ekangaha. Indake uko darangba sing'e nijahaoba Notjengni nokchipak matchu moangenggipa pante bi'sani ki'sang ja'rikangaha.

Nokni saraona sokon Kaling Notjengko minge sandiaha.

"Angan bini depante, baba aide skangon sijok," ua pante bi'sa aganchakaha.

Pante bi'sa Kalingko asonge neng'takna-mangba aganjaha.

"Chingade jebasi manderangko nokchakja, Nokmachi re'angbo, biasa jekoba dakgen," pante aganna sikbrebre-gija Kalingna, Nokmani nokona rama mesokataiaha. Ia pante bi'sani katta gitade, Kaling ua songo waltuna man'a ba man'gijanide ua songni Nokmani ka'sachakaosa pangchakaig nok ine ua ma'sina man'aha.

Nokmani nokba uni skango nikanggipaoni dintang-beaha, noksamo donggipa te'brong bolma dong'jahachim. Songni Nokmade an'tangko uikugenma ine ua chanchi-joljolangengachim.

Nokmani saraona sokon achak manggni chawatbae, haida monggot ra'bitana nidikbate, Kalingko chikna gitik gitik dakpile sing'aha. Janggil kom'chik chikari buchuma babilsioni nauate nokchiniko sakoba okamataha. Kaling ua buchumako name nirike, skango uni uigipa Nokma me'chikan ong'chongmota ine uiaha. Uni segipa dongkuenga ong'ode namen budepagnok ine uko nikkuna ka'donga pil'sa ka'dongja pil'sa dakengachim. Dikdiksani ja'mano bilsi kolatchimangni me'asa

saksa aro dambekalgipa me' chik saksa nokningoni ong'katbae Kalingko niataha. Uamangni agangrikani bewalko niriken, uamangka jiksese ine Kaling uina man'aha.

"Ian Nokmani nok ine me'sokatanasa re'baengachim," Kaling aganna a'bachengaha.

"Oe, mainaba nangachimma ?" Dambekuenggipa me'apa sing'aha.

"Angade Chigitchakgreona ma'nokko grongnasa re'engachim, da'oara sokjawajok. Unasa Notjeng baksa skango uigrikani giminsa bini noko waltuna miksonge re'baachim. Bisongara nang'onasa watataia," ine Kaling an'tangko agital gita mesoke aganaha. Ua an'tangko uiatsrangnade kratchanike, buchumani uko mikjaptaitaie nie dongengoba uija dake unade ku'sik on'jaha.

"Ang mama budepade dongjajok, uni gimin songre songgabatgiparangko nokchakama nokchakjama angosa pangchakaiaha beben. Re'anggipa bilsirango ching song jolo, nang'gita songregipa manderang walchanga dake, cha'uedakket dake namen habi-jabi ong'beahani gimin darangkoba mande uigijakode nokchakna on'jajok," me'apa aganaha.

Ia dambe me'apani kattarangko knarikon,uan da'ode Dolbarini Nokma ong'skaengaha ine Kaling uiaha, aro an'tangko onatbee mesokaha. Jaksirangchi kni chitmile, ia a'gital mandea banoni, maidakgipa ong'gen Nokma chanchijoljolengachim. Ia mandea namen budepa ong'aha ine cha'ugipa dolni mande ong'nade kranikjaengachim.

Uni chanchiako uisoa gita, "Angade indake dakaonide chel'sranga, diloba an'tangnasa dilaia. Tuchakna baranda mangmangko on'paoba ong'aigen," Kaling a'achi bamchikchike aganaha.

Kalingni kattarangko Nokma bebe ra'aha aro mande-naba ka'sachakaha. Ua jikgipako Kalingna mi song'china

ge'ete golpo ka'e rona barandao asongataha. Nokma an'tangni gadangni kri chokkio kang'jangjang asonge mola ringaha. Kalingba an'tangko niroke mora sale asongpaaha.

"Biri sada ringana batede molaan nambatasa," Nokma a'bachengaha. "Angaba poraibranga dakesa iarangni giminba uipaa. Ong'jaode angade ia biaponaba sokbaa-rok sokbajarokchim."

"Banonisa na'ara?" Kaling uina sikbee sing'aha, maina ia mandeara inditan ku'srame agana je ua an'tangni bilmiting salrango bigitan be'en bimangba apsanangachim ine gisik ra'atpilaha.

"Angade Chigitchakgreoninba. Na'a ang ma'a paakode uinggenchim. Aide da'oba dongenga."

Kaling maibakai an'tangchi nangsoaha, indiba ua a'achi bamgope, uni ja'a samba gita chibrimrangni riting riting malamako nie an'tangni mikkangko donnuaha.

"Na'ara sani mai nangasa?" Nokma Kalingko sing'skaaha.

"Chatchian dongpaja angade.....aganan kratchaa," Kaling ka'sne aganaha.

Haida skia poraia dongpagijagipa nokdangrangoni saniba bak nangakon ine ia Nokma chanchichipe donai aha, maina ua Kalingni mikkangko an'tangna kratcha'enga gita nikachim.

"Maina kratchanade nanga, angni ma'kringba dal'paja. Pagride pagri brangbebeaia. Aiara angko dakchakanan chol ong'pajajok, angade mandeskao mepal cha'esa poraipaa. Haida angni pagipaan skia poraia dongkalani giminsa angaba chakchikna man'paaijokkon. Tekkia chisa skia man'a ine aini aganakan angade pangnaba gualja," Nokma aganaha.

"Nang'para siahama indakode?" Kaling sing'aha maina ua tale uisrangna sikengachim.

"Siaanma, sijaanma, biade angni bilsisa ong'on gale

katjokna. Da'onaba mamung kobor dongja. Chingaba sandija, Chu ringe re'bae, aiko kajia am'e doke-sate, angko ja'a be'tongate donanganaba. Iakaiwa." Nokma an'tangni gamchako on'tisa saldoe mesokaha. Ja'pingni greng be'ani gimin on'tisa gonggea gita chin dongkuengachim. Uni a'selsa ia Nokmara on'tisa ja'a sokmangija gita re'achim, ine Kaling da'osa uiaha.

Ia Nokmara uni saknaate gale katgipa bi'saan ong'chongmota ine Kaling da'o ma'siaha.

An'tangko ong'siatgipa mandean uni noko da'o ka'sachakaniko am'enga ine uiode, jakbikpilgenkon ine Kaling kenaba kenengachim. Indake ua an'tangko uiatjana simsakbeaha.

Meatam cha'ani ja'mano dikdiksa songni nokni duk a'selrangko agane roeangachim. Kaling an'tangko ka'dongdraate Nokmao mingsa sing'aha, "Na'a nang'ni ja'ako ong'siatgipa mandeko nikode kema watna man'genchimma?"

"Oh.....biara angni pagipaanchimnaba," inesan Nokma aganchakaiaha. Kaling Nokmani miksongako ma'sisokjahaoba sing'taina pa'jaha.

Jensalo Kaling barandao biap on'ao tuengachim, uko nokchakgipani kattarangni miksonganiara mai chong'mot chanchiaha. Pagipa ong'ani gimin kema ka'na man'aigen ine miksongama ba pagipa ong'eba indake dakani gimin kema ka'na man'jawa inesama, ua mikgil sikkujana king king chanchibeaha.

Pringo andalengpition Kaling chakate, babilsio wa'al sikenggipa Nokmani jikgipana agane, songona re'na re'chakataha. Songjatchiko re'angmitingo bang'bata nokrangoni manderangan chakattokkujachim. Ua ka'sne ka'sne chudatgipa Dimbil a'dingko dona a'bachengaha. Uni jikko deko gale katangani walo, jeo gadoe ua walko re'atachim, ua apsan bolko ua nikjaha. Haida saoba uko bol

ratahakon ba krong sol'ahakon, ong'jaoba a'ba cha' giparangan supee am'bol so'ahakon ine ua chanchie suk ong'jaha. Dikdiksana ua Dolbari songko nigame roaha; chel'ahani gimin seng'brakahaoba do'o gisika aro matchu mikoarangkosan knana man'aiahachim.

Ua salaramchi mikkange songtangona doangaha. lachi uachi boldimrango ba'e do'bret dopincheprang cha'aniko am'e jikjakgiparang, uni mikkangoni prang-prang bile kattokengachim. Skangona bate ramaba pang'sangbataha. Noktangona re'pilmitingo jikgipa degiparangko grongeahaon mai kattarangko aganegen chanchiroroangengachim. Uko niksoon jikgipa mairongpile kusi ong'sogenchim ukoba gisiktango, uamangni kusi ong'e dongmiting somoirango Na'batni ka'dingwachekakosa nikataingachim, Pil'satai ua an'tangni gamchatbatgipa salrangko saksan skatang maikai re'ataha gisik ra'at-pilengachim.

Ua rori mahajonrang baksa bakrime bading chiwale namen cholibeahachim. Ua ma' chi nochi re'gija, darangniba uigija chel'aosa kusitang janggi tangaha. Ua salrango gisepode, ua an'tang demechikko gisik ra'e ka'pakata, indiba jikgipani gimin chanchion wagam chikmi-jilmanpilachim. Noktango gualna gita chu ringe, joa kale salrangko re'ataiaha. Jensalo uni bilsa re'angaha ua gisik aro be'eni an'senggijanirang man'aha. Indake ua an'tangna simsakjae Tuberculosis saaha. Uni ripengrang man'a dipet uko gelna jonton ka'aha. Uni tangka je chimonggiminrang gnangchim, gimikan biji su'e sam ra'e bon'tokaha, Jensalo ua saa nampilaha uni uigiminrang darangba una kamchi ba tangkachiba dak-chakna jechaktokaha. Uni an'sengmitingo ripeng dak-giparangoni uko nikode chatta winpenge katgiparangan gnangchim. Indake Kaling saksan galchipako man'aha.

Pilakchiba cholnikjae, Kaling bon'kamao demechikko sandina miksongaha. Haida jikgipade dongjawabakon

ine ua chanchibaengachim.

Dilbariosa ua jiktangko tangengkua ine kna-chengaha Skangode Kalingara jiktangko gisik ra'atomangmangan tiltipile ka'onangchim indiba da'ode ua maibakai ka'onangani gisik nabajaha: batesa nikna sikaha. Nokdang da'o maikai ong'enggen, nikna sikank amchakjae ua pringonin cha'a ringa grioba bil ama dipet a'bri a'dingko doangaha.

Adita salchuhaon Chigitchakgreona separgaha aro Kaling chubatgipa a'chikko neng'taktaitaie doangaha, Uni re'bagimin ramasamo a'ba damsakoba nikbajachim; chel'achikosa ua tangsekgilgil mi misi namako nikate a'ba nokgiparangna kusi ong'chakatengachim. Buchuma budepa aro bi'sarangna agre songni manderangde pilakan indaka somoiode a'bachu re'angtokgnok ine ua chanchi-engachim. Iachi uachi niroroe, monggot kottine ka'sne re'e ua songona sokaha Skango uni nikanggippa biap-rang dingtang ong'aha. Banoba banoba burung a'chang donggiparanggoba mande nokrerasajok. Badiaba bolde dongjaha, banoba bol gitalko niksajok. Noktangko nigitoaton te'brong ti gatchu grimgrim nikataiaha. An'tangni ge'anggiparangan indake dal'daltokaha ine uie ua kusi ong'beaha. Jakmatangko cha'mangnok ineba ka'dong-baengachim maina ia somoioara te'brong minkari ong'-engachim.

Jensalo saraona dogataha, Kaling niwilwale mion matcku nolko nikjaha, nokmongkoba chonbate dingtang biaposa riksaaha ine nikaha. Nokkingni am'pang git-chame sodapangengahachim. Babilsiba dingtang biaposa-jokchim. Kaling te'brong salakimo an'tangni monggotko su'chale dengdale pilakchikon niengachim. Babilisi mikkango an'tangchi janggilate asongchong-chrote merong basoenggipara an'tangni jikgipaan ong'na nanggen ine miktuatgija-niaha. Knia bokbeaha aro skango uni rim'chombake salbikbikgipa knitomara supari rongsa

gitasan ong'aiahachim. Jiktangkode mangrakuenggen ine Kalingde chanchibaengachim, indiba nikmanchaahaoara buchumabeesa, dingtang beesa nikeaha. Uni gana-suri chola-suriko ganengakonikoara Kaling wagam chikmijilande chel'srangaha, batesa ua inditan jiktangna ka'sachakaha.

Kaling nie romanoa jiktangko okamna-sienghachim. Ua tiktak somoio, babilioni bilsi bongamangni me'chik bi'sa ong'katbae Kalingko nikataha. Ia me'chik bi'sara Wanme gita dakani gimin uko nikarion Wanmeni bi'sa ong'na nanggen ine Kaling chanchiaha. Sawan ua bi'sani pagipa ong'enggenchim, ukoba Kaling gisiktango uina sikbeaha. Kaling ua bi'sako tongtong nie uamangchipakna ja'kusa ba'jaku'gninasan ga'jitaengkuachim. Unon ua bi'sa ambitangni mikkangchipak re'ange chadenge Kalingko nisoaha.

"Ambi; ambi, bi' amgipa re'baenga," Bi'sa ambitangna ka'sne aganaha. Kaling uamangona sepangahani gimin bi'sani kattarangko ua knagija ong'nan man'jaha.

Ambigipa bakan an'pile nioara mamung saloba niktaina ka'donggijagipa mikkangko nikaha. Dikdiksana jaja jiji dake ua maiko dakgen uipiljaha. Ua apsan somoion Kaling jiktangni mikkangko sepango rongtale nikna man'aha. Uni mikkang ong'siako nikon Kaling aiao inmanpilaha; jedakoba duk ba cha'asianisa uko indake ong'siataha ine ua chanchichipaha.

Kaling ka'sachukbee jikgipako niengon, uade dingtanga chanchiskaengachim. Ia me'asani chanchining'gijani a'sel uamangni nokdang rurongna nangaha ine skangni salrangkosa gisik ra'ate ka'a ding'baskaaha.

"Banoni mande! Banoni bi'amgipa! Chingade tangkaba dongja, merongba dongja. Re'angbo! Mamungkoba man'angjawa. Chingade bi'ame chaja." Gam'batroroe jikgipa Kalingko sairoroaha. "Chatchi mahari

dongjama. Branggipakode chingade ma'a-nosa aldumit-tanga. Re'angbo ! iano chadengchanabe," jikgipa bachi-koba niatesa matchu-matteko a'rika-gotata gita ku'-tipgija saie a'rikataha.

"Iarangna agre gipin kattakode angna aganna man'-jawajokma ?" Mikchidingding jikgipako nie Kaling sing'-aha, indiba ia kattarangko mamungkoba knaja gitasa niatmanggijasa jikgipade gam'e gam'e saiangkuaha.

Koka babilsio me'rakku so'engachim. A'palchi maiba ong'enga ine uaba nie nauatoa bi'am-gipakosa saienga manengenga ine uiaha. Gisep gisep bi'amgiparang re'baode noko je donga on'tiprakde on'atrongani gimin ua an'tangni me'rakku so'ako ckejoljole, spojoljole ong'katbaaha. Uni me'rakku on'ako Kaling ra'chakahaosa Koka mikkangko nido-man'aha. Kalingni katangmitingo Kokade bilsu chi'-gnisan ong'aiengkuachim. Ua da'o budepabegipa an'tangni nokgipako rang'sanan uiaha. Ua krenge inwatwatenggipa buchumachiko bik, ka'sne janggilate re'angenggipa budepako bik ku'angpile nikuake dongaiaha.

Ka'sne ka'sne Kaling noktangoni an'pilangaha. Ua je ramako kusi ong'e re'baaha, ua apsan ramakon noktangko nipilgija re'bapilaha. Uni gisiko ka'dongsoara dikdiksa-non dintang ong'aha. Ua songko badee rama joljol ka'-sinbeesa ong'onbapilaha. Ua neng'a aro bilgriani gimin ja'sku til'tilpilengachim. Gisepode salakimrango neng'take, an'tangni janggi tanganini gimin chanchie rang'-speengachim. Uni katangmitingo gadoe waltugipa rangre bolni ritchongona tongtong sokbaon ua uni katangani walko gisik ra'atpilaha. Ua salo ua biaponi pringon re'-angpile namgrikeode uamangni nokdangara indake ong'-jawachim ine ua dikdiksana hikhikari grapaha. Uni ka'-tong da'o jrimbeaha, aro cha'a ringa griani gimin bilgri-bate banobade malambrakesa rama namgijarangko ong'-

onna nangaha. Ua banona miksonge re'gen, aro an'tangni bon'kamgipa salrangko bano matchotatgen, da'osa chanchia nabaaha. Uni pakkreo sitegipa jola aro jakbitgipa monggotna agre, an'tangni ine kangna uo mamungba griaha.

Je ramako doangon Kaling salchugragrao sokachim apsan ramako ong'onbapilmitingo bang'bata somoiko nangaha. Walsimsimahaosa ua Dolbariona sokbaaha. Da'oba Nokmana agre uko darangba nokchakjawa ine uie Nokmaonan re'angpilaha. Uamangba una skang gitan ka'sae dakaha; indiba Kaling an'sengbrejaenga ine agane meatamkomangba cha'na jechake tusiaha. Waltingahaon Kaling tusimitingo ma'ambeengachim.

Segipani janggalate re'angmanoba Na'batde ka'onangan namningjaha. Salpaksa badeangahaosa gisik ka'sinange chanchina a'bachengaha. Indita bilsu ruutani ja'mano maina ua noktangona re'bapilaha? Maini a'sel ua inditan kangalbee re'bapilna nanga. Iarangi gimin bikpil pangpil chanchie ua walgimikan tusina man'piljaha. Pringo pringni sandina re'na nanggen ine ua mangsongchongmotaha. Jedakeba Kaling Dolbarion waltugen, aro depanteni nokona re'on sandina man'aigen ine ua chanchiaha.

Indake Na'bat pring seng'srapgijan chakataha. Dolbariona depanteona re'angenga ine Wanmeko de'mesae agane donangaha. Ua chel'e re'rongjahaoba mamung kena sin'ako gisik ra.gija, saksan cheng'chengari a'brini ramako ong'onrorobaaha. Ia somoio depanteni noko segipani bimangko gisiko nikatengachim. Haida gipin biapchi re'anggenchim ong'oba cha'gija ringgijade watatjawa ine chanchie mepring cha'ani somoi ong'na skang sokna krengebeaha. Un salon ua segipao kema bi'e nokona rimdopilna miksonge, mai kattarangko segipana agano namgen gisiko chanchiroroangaha.

Dimbil a'dingona sokahaon, Dolbari songni nokking-rangko nikate, uarangoni badiabaon ba depanteni nokon segipa dongkugen ine Na'bat nikena ka'dongbeengachim. Dolbariona sokahaon, je mande grongchenggipaon segipani gimin sing'-sandina chanchibaengachim, indiba bi-sarangna agre dal'gimin manderangko saksaba nikjaeng-achim. Pringchibara indaka somoio chi'indikdik dakoara suama samama inmanpilengachim. Ua iachi uachi manderangni nokrangko niwilwale darangoba sing'na chol nikjae, depanteni nokona tongtong re'angaha.

Miksongaona sepangrorobaahaon uni re'mikkanga dingdingan manderangni jikjaka ku'rangko knana man'aha. Depanteni nok sarako nikaton mande bang'e tom'dakakosa nikatsrangaha. Maiba a'sel ong'chongmotna nanggen ine ka'suangsuang dake ua ta'rakbatroroe re'angaha. Sokahaon, saoba maikoba agangenma ine mikske-mate mandeskako nidooba darangba mamungkoba agang-gija jrip daktoke biap jite rama watesa on'aiaha. Depanteni nokoni sawa mai a'sel ong'jok, sambao donggiparangko niwilwale gisiktango depanteko sandiaha. Uni nokningchi napange jaja jiji ong'mitingo depante re'bae, "Maina re'baesa ?" ine sing'aha.

"Nang'pako sandinasa re'baachim," ine ma'gipa aganchakaha.

Ma'gipani mikkango chadengchape manggisini mikkangko depantegipa pindapako kikaha. Na'bat nione, an'tangni segipaanma saobasama inmanpilaha maina mikkang be'ani giminan dingtangbeahachim.

Ma'gipa jadasie mikchiba ga'akjaenga ine nike de pante agananguaha, "Nibo, ai, da'ode ja'manchakduga-jok. ~~Semoi~~ dongkuengon na'simang kema ka'grikna nangachim.

Author.

8793 B O N ' A H A
15.4.96.
Dis

DISTRICT LIBRARY

EAST GARO HILLS DISTRICT

WILLIAM NAGAR



DATE LABEL

**This book must be returned within 15 days
from the date of issue.**

[illegible]